

四庫全書

子部

欽定四庫全書

子部

御定孝經衍義卷八十一

詳校官中書_臣羅錦森

編修_臣倉聖脈覆勘

總校官檢討_臣何思鈞

校對官修撰_臣陳初哲

謄錄監生_臣高瑞相

欽定四庫全書

御定孝經衍義卷八十

卿大夫之孝

愛親

左傳公孫敖卒於齊齊人或為孟氏

公孫敖之家

謀曰魯爾

親也飾棺寘諸堂阜

魯齊境上

魯必取之從之卞人

魯卞邑大夫

以告惠叔

叔教之次子難也

猶毀以為請立於朝以待命許之取

而殯之齊人送之書曰齊人歸公孫敖之喪為孟氏且

國故也

文公十有五年

臣按公孫敖從莒氏女不復其國故卒於齊其子惠叔請歸殯至期年尚未之許請之不已弗改毀容故曰猶毀至是立朝待命以示慘戚遂使其父得殯於寢可謂有愛親之心焉

國語楚語屈到

文子

嗜芟

茂也

有疾召其宗老而屬之曰祭

我必以芟及祥宗老將薦芟屈建

屈到之子

命去之宗老曰

夫子屬之子木

屈建字

曰不然夫子承楚國之政其法刑

在民心而藏在王府上之可以比先王下之可以訓後

世雖微

無也

楚國諸侯莫不譽其祭典有之曰國君有牛

享大夫有羊饋士有豚犬之奠庶人有魚炙之薦籩豆

脯醢則上下共之

以多少為差

不羞

進也

珍異不陳庶

多侈也

子不以其私欲干國之典遂不用

臣按唐柳宗元非國語曰門內之禮恩掩義父子

恩之至也而芟之薦不為愆義屈子以禮之末忍

絕其父將死之言吾未敢賢乎爾也苟薦其羊饋

而進芟於籩是固不為非禮之言齋也曰思其所

嗜屈建曾無思乎且曰違而道吾以為逆也宋蘇

軾復著論非柳宗元曰甚矣子厚

宗元字

之陋也子

木楚卿之賢者也夫豈不知為人子之道事死如

事生況於將死丁寧棄而不用人情之所忍乎是

必有大不忍於此者而奪其情也夫死生之際聖

人嚴之薨於路寢不死於婦人之手至於結纓冠

啟手足之末不敢不勉其於死生之變亦重矣父

子平日之言可以思掩義至於死生至嚴之際豈容以私害公乎赫赫楚國若敖氏之賢聞於諸侯身為正卿死不在民而口腹是憂其為陋亦甚矣使子木行之國人誦之太史書之天下後世不知夫子之賢而唯陋是聞子木其忍為此乎故曰是必有大不忍者而奪其情也然禮之所謂思其所樂思其所嗜此言人子追思之道也曾皙嗜羊棗而曾子不忍食父沒而不能讀父之書母沒而不

能執母之器皆人子之情自然也豈待父母之命
耶今薦芟之事若出於子則可自其父命則為陋
耳豈遂可以飲食之故而成父莫大之陋乎曾子
寢疾曾元難於易簣曾子曰君子之愛人也以德
細人之愛人也以姑息若柳子之言為然是曾元
為孝子而曾子顧禮之末易簣於病革之中為不
仁之甚也蓋宗元據祭義思其所樂思其所嗜之
言而非屈建蘇軾又據曾子君子愛人以德細人

愛人以姑息之言而非宗元同為愛親之意而軾
之論深遠矣

楚平王囚伍奢而召其二子告以免父死奢曰尚至胥
不至尚之為人廉死節慈仁而孝聞召而免父必至不
顧其死胥之為人智而好謀勇而矜功知來必死必不
來於是王使人召之曰來吾免而父伍尚謂胥曰聞父
免而莫奔不孝也父戮莫報無謀也度能任事智也子
其行矣我歸死伍尚遂歸胥出奔吳

臣按奢之二子皆可謂孝子使無胥也尚亦不歸使無尚也而胥亦不奔矣夫孝子之有深愛者苟可以免其父則捐其身勿恤也有其歸之以幾免有其奔之以為報斯兩無憾矣

萬石君石奮為諸侯相長子建次甲次乙次慶以馴行孝謹官至二千石於是景帝曰石君及四子皆二千石人臣尊寵乃舉集其門凡號奮為萬石君萬石君家以孝謹聞乎郡國雖齊魯諸儒質行皆自以為不及也長

子建為郎中令建老白首萬石君尚無恙每五日洗沐歸

謁親入子舍竊問侍者取親中帟廁牖

索隱曰中裙近身衣也師古曰

廁牖者近身之小衫若今汗衫也牖音投

自澣洒

洒音洗

復與侍者不敢令萬

石君知以為常萬石君卒建哭泣哀思扶杖乃能行歲餘建亦死諸子孫咸孝然建最甚

臣按石奮子弟俱以馴行孝謹著稱雖由父兄之教亦其天性仁孝有異乎常人也

馮唐以孝著為郎中文帝拜唐為車騎都尉景帝以唐

為楚相

嚴延年母從東海來欲從延年臘到洛陽適見報囚母大驚便止都亭不肯入府延年出至都亭謁母母閉閤不見延年免冠頓首閤下良久母乃見之因數責延年幸得備郡守專治千里不聞仁愛教化有以安全愚民顧乘刑罰多刑殺人欲以立威豈為民父母意哉延年服罪重頓首謝因自為母御歸府舍母畢正臘謂延年曰天道神明人不可獨殺我不意當老見壯子被刑戮

也行矣去汝東歸埽除墓地耳遂去歸見昆弟宗人復為言之後歲餘果敗東海莫不賢智其母

臣按經言愛親者不敢惡於人則雖以天子之尊必無有可以專用刑殺為威者也自天子以至於郡縣吏皆有為民父母之責者也民吾子也由乾父坤母言之民吾同胞也與我同戴一大父母者也屠戮吾民無異屠戮吾子弟也有屠戮子弟而不得罪於父母者乎天道神明人不可獨殺故酷

吏未有不反中其身者也陷於刑戮以為父母憂
真不孝之大者也屠伯有賢母而長惡不悛唐嚴
武驕暴而母憂為官婢故人一舉足而當以父母
之心為心也

祭彤早孤以至孝見稱遇天下亂野無烟火而獨在家
側每賊過見其尚幼而有志節皆奇而哀之

魯恭父建武初為武陵太守卒官時恭年十二弟丕七
歲晝夜號踊不絕聲郡中賻贈無所受乃歸服喪禮過

成人鄉里奇之

馮異以郡掾監五縣與父城

縣名

長苗萌共城守為王莽

拒漢異間出行屬縣為漢兵所執時異從兄孝及同郡
丁綝呂宴並從光武因共薦異得召見異曰異一夫之
用不足為強弱有老母在城中願歸據五城以効功報
德光武曰善

樊宏子儵謹約有父風事後母至孝及母卒哀思過禮
毀病不自支世祖常遣中黃門朝暮送餼粥

鄧隲母新野君寢病兄弟並上書求還侍養太后以閭

隲弟名

最少孝行尤著特聽之賜安車駟馬及新野君薨

隲等復乞身行服章連上太后許之隲等既還鄉里並
居冢次閭至孝骨立有聞當時

陰興永平元年詔書稱其在家仁孝有曾閔之行

丁鴻父緄初從世祖征伐鴻獨與弟盛居憐盛幼小而

共寒苦及緄卒鴻當襲封

陵陽侯

上書讓國於盛不報既

薨乃挂衰經於冢廬而逃去鴻初與九江人鮑駿同事

桓榮鴻亡封與駿遇於東海陽狂不識駿駿乃止而讓之曰昔伯夷吳札亂世權行故得伸其志耳春秋之義不以家事廢王事今子以兄弟私恩而絕父不滅之基可謂智乎鴻感悟垂涕嘆息乃還就國

臣按史臣論曰原丁鴻之心主於忠愛其終悟而從義也異夫徇名者焉蓋鄧彪劉曄之讓其弟其弟遂受之是彪曄身欲美名而陷弟不義也鴻不遠而復謂之忠愛豈溢美哉

郅惲年十二失母居喪過禮及長理韓詩嚴氏春秋後惲授皇太子韓詩侍講殿中及郭皇后廢太子意不自安惲乃說太子曰久處疑位上違孝道下近危殆昔高宗明君吉甫賢臣及有纖介放逐孝子春秋之義母以子貴太子宜因左右及諸王子引愆退身奉養母氏以明聖教不背所生太子從之帝竟聽許惲遷長沙太守先是長沙有孝子古初遭父喪未葬鄰人失火初匍匐樞上以身扞火火為之滅惲甄異之以為首舉

臣按鄧惲之說太子舉古初皆錫類之孝亦謂愛其母而施及於人者也

廉范父遭喪亂客死於蜀漢范遂流寓西州西州平歸鄉里年十五辭母西迎父喪蜀郡太守張穆丹父之故

吏乃重資送范范無所受與客步負喪歸葭萌載船觸石破沒范抱棺柩遂俱沉溺衆傷其義鉤求得之療救僅免於死穆聞復馳遣使持前資物追范范又固辭

賈逵薦陳國汝郁郁字叔異性仁孝及親沒遂隱處山

澤後累遷為魯相

臣按東觀記曰郁年五歲母病不能食郁常抱持涕泣亦不食母憐之強為飯宗親共異之因字曰異也

班超為人有志不修細節然內孝謹居家常執勤苦不恥勞辱

劉平弟仲為賊所殺其後賊復忽然而至平扶持其母奔走逃難仲遺腹女始一歲平抱仲女而棄其子母欲

還取之平不聽曰力不能兩活仲不可以絕類遂去不顧與母俱匿野澤中平朝出求食逢餓賊將烹之平叩頭曰今旦為老母求菜老母待曠為命願得先歸食母畢還就死因涕泣賊見其至誠哀而遣之

江革少喪父獨與母居遭天下亂盜賊並起革負母逃難備經險阻常採拾以為養數遇賊或劫欲將去革輒涕泣求哀言有老母辭氣愿款有足感動人者賊以是不忍犯之或乃指避兵之方遂得俱全革轉客下邳貧

窮裸跣行傭以供母便身之物莫不畢給建武末年與母歸鄉里每至歲時縣當案比革以母老不敢動搖自在轅中輓車不用牛馬由是鄉里稱之曰江巨孝太守常備禮召革以母老不應及母終至性殆滅常寢伏冢廬服竟不忍除郡守遣丞掾釋服元和中天子思革至行制詔齊相曰諫議大夫江革前以病歸今起居何如夫孝百行之冠衆善之始也國家每惟志士未嘗不及革縣以見穀千斛賜巨孝常以八月長吏存問致羊酒

以終厥身如有不幸祠以中牢由是巨孝之稱行於天下及卒詔復賜穀千斛

陳紀以至德稱兄弟孝養閨門雍和後進之士皆推慕其風遭父憂每哀至輒嘔血絕氣雖衰服已除而積毀消瘠殆將滅性豫州刺史嘉其至行表上尚書圖像百城以勵風俗

吳祐父恢為南海太守祐年十二隨從到官恢欲殺青簡以寫經書祐諫曰今大人踰越五嶺遠在海濱其俗

誠陋然舊多珍怪上為國家所疑下為權威所望此書
若成則載之兼兩昔馬援以薏苡興謗王陽以衣囊徼
名嫌疑之際先賢所慎也恢乃止撫其背曰吳氏世不
乏季子

延陵季子
吳氏之先

矣及喪父居無擔石而不受贍遺

臣按吳祐之愛其父愛之以德也殺青寫書未至
於不義而祐且諫非至愛結心能如是乎

趙咨少孤有孝行州郡舉孝廉並不就大司農陳豨舉
咨至孝有道累遷敦煌太守以病免還躬率子孫耕農

為養盜常夜往劫之咨恐母驚懼乃先至門迎盜因請
為設食謝曰老母八十疾病須養居貧朝夕無儲乞少
置衣糧妻子物餘一無所請盜皆慙嘆跪而辭曰所犯
無狀干暴賢者言畢奔出咨以物與之不及由此益知
名

朱穆五歲便有孝稱父母有病輒不飲食差乃復常

樂恢父親

恢父名

為縣吏得罪於令收將殺之恢年十一

常俯伏寺門晝夜號泣令聞而矜即解出親

鄧彪少勵志修孝行父卒讓國於異母弟荆鳳顯宗高其節下詔許焉

臣按鄧彪之讓雖不合於禮之正經蓋亦探其父志而為之者猶不失愛親之意也

韓稜四歲而孤養母弟以孝友稱及壯推先父餘財數百萬與從昆弟鄉里益高之

虞詡早孤孝養祖母縣舉順孫國相奇之欲以為吏詡辭曰祖母九十非詡不養相乃止

孔融年十三喪父哀悴過毀扶而後起州里歸其孝

魏司馬芝少為書生避亂荊州於魯陽山遇賊同行者
皆棄老弱走芝獨坐守老母賊至以刃臨芝芝叩頭曰
母老惟在諸君賊曰此孝子也殺之不義遂得免害以
鹿車推載母居南方十餘年躬耕守節

杜畿少孤繼母苦之以孝聞

河東太守李敏惡公孫度所為乃將家屬入於海敏子
追求敏出塞越二十餘年不娶州里徐邈責之曰不孝

莫大於無後何可終身不娶乎乃娶妻生子胤而遣妻
常如居喪之禮不勝憂數年而卒胤生不識父母及有
識蔬食哀戚亦如三年之喪以祖父不知存亡設主奉
之由是知名仕至司徒

韓暨同縣豪右陳茂譖暨父兄幾致大辟暨陽不以為
言庸貨積資陰結死士尋擒茂以首祭父墓由是顯名
孫禮初喪亂時與母相失同郡馬台求得禮母禮推家
財盡以與台台後坐法當死禮私導令踰獄自首既而

曰臣無逃亡之義徑詣主簿溫恢恢嘉之具白太祖各減死一等

臣按禮之報台為已厚矣然以母故則報台之厚正念母之勤也

徐庶從蜀先主為曹公所追破獲庶母庶辭先主而指其心曰本欲與將軍共圖王霸之業者以此方寸之地也今已失老母方寸亂矣無益於事請從此別遂詣曹公

楊洪忠清款亮憂公如家事繼母至孝

吳司空孟仁本名宗避孫皓字易焉初為監池司馬自能結網手以捕魚作鮓寄母母因以還之曰汝為魚官而以鮓寄我非避嫌也遷吳令時皆不得將母之官每得時物束以寄母常不先食及聞母亡犯禁委官特為減死一等復使為官盖優之也

楚國先賢傳曰宗母嗜
筍冬節將至時筍尚未

生宗入竹林哀嘆而筍為之出
得以供母皆以為至孝所感致

太史慈少好學仕郡奏曹史會郡與州有隙慈為州家

所疾恐受其禍乃避之遼東北海相孔融聞而奇之數遣人訊其母并致餉遺融屯都昌為賊管亥所圍慈從遼東還母謂慈曰汝與孔北海未嘗相見至汝行後瞻恤殷勤過於故舊今為賊所圍汝宜赴之慈留三日單步徑至都昌見融因求兵出斫賊融欲告急於平原相劉備慈請行融曰今賊圍甚密衆人皆言不可卿意雖壯母乃實難乎慈對曰昔府君傾意於老母老母感遇遣慈赴府君之急今衆人言不可慈亦言不可豈府君

愛顧之義老母遣慈之意耶事已急矣願府君無疑融
乃然之慈到平原說備備遣精兵三千人隨慈賊聞兵
至解圍散走事畢還啟其母母曰我善汝有以報孔北
海也

臣按融愛慈而恤其母之窮慈愛其母而赴融之
急盖不敢惡於人之理亦轉相及也

陸績年六歲於九江見袁術術出橘績懷三枚去拜辭
墮地術曰陸郎作賓客而懷橘乎績跪荅曰欲歸遺母

術大奇之

陸景

遜孫抗子

母張承女諸葛恪外甥恪誅景母坐見黜景

少為祖母所養及祖母亡景為之心喪三年

晉李密父早亡母何氏改醮密時年數歲感戀彌至烝
烝之性遂以成疾祖母劉氏躬自撫養密奉事以孝謹
聞劉氏有疾則涕泣側息未嘗解衣飲膳湯藥必先嘗
後進有暇則講學忘疲少仕蜀為郎泰始初詔徵為太
子洗馬密以祖母年高無人奉養遂不應命乃上疏曰

臣以險釁夙遭閔凶生孩六月慈父見背行年四歲舅奪母志祖母劉愍臣孤弱躬親撫養臣少多疾病九歲不行零丁孤苦至於成立既無伯叔終鮮兄弟門衰祚薄晚有兒息外無期功彊近之親內無應門五尺之童茆茨子立形影相弔而劉早嬰疾病常在床蓐臣侍湯藥未嘗廢離前太守舉臣察臣孝廉後刺史舉臣秀才臣以供養無主辭不赴命明詔特下拜臣郎中尋蒙國恩除臣洗馬猥以微賤當侍東宮非臣隕首所能上報

臣具表以聞辭不就職詔書切峻責臣逋慢郡縣逼迫
催臣上道州司臨門急於星火臣欲奉詔奔馳則劉病
日篤苟徇私情則告訴不許臣之進退實為狼狽伏惟
聖朝以孝治天下凡在故老猶蒙矜恤況臣所苦尪羸
之極劉日薄西山氣息奄奄人命危淺朝不慮夕臣無
祖母何以至今日祖母無臣何以終餘年母孫二人更
相為命是以私情區區不敢棄遠臣密今年四十有四
祖母劉今年九十有六是臣盡節於陛下之日長而報

劉之日短也烏鳥私情願乞終養伏願陛下矜愍愚誠
聽臣微志庶劉僥倖保卒餘年臣生當隕身死當結草
帝覽之曰士之有名不虛然哉乃停召

臣按蜀志密嘗奉使聘吳吳主與羣臣汎論道義
謂寧為人弟密曰願為人兄矣為兄供養之日長
蓋仁人孝子之言而父母俱存者未必知其痛也
羊祜年十二喪父孝思過禮事叔父耽甚謹尋遭母憂
長兄發又卒毀墓寢頓十餘年以道素自居

卻詵以對策上第拜議郎母憂去職詵母病苦無車及
亡不欲車載柩家貧無以市馬乃於所住堂北壁外假
築開戶朝夕拜哭養雞種蒜竭其方術喪過三年得馬
八匹輿柩至冢負土成墳

荀顗性至孝博學洽聞理思周密與扶風王駿論仁孝
孰先見稱於世年踰耳順孝養蒸蒸以母憂去職毀幾
滅性海內稱之

李熹宣帝辟為太傅屬固辭疾郡縣扶輿上道時熹母

疾篤乃竊踰城以出而徒還遂遭母喪論者嘉其志節
王沉少孤養於從叔司徒昶事昶如父奉繼母寡嫂以
孝義稱

山濤以母老辭職詔曰君雖乃心在於色養然職有上
下旦夕不廢醫藥且當割情以隆在公濤心求退表疏
數十上久乃見聽加賜床帳茵褥禮秩崇重時莫為比
後除太常卿以疾不就會遭母喪歸鄉里濤年踰耳順
居喪過禮負土成墳手植松柏詔曰山太常雖居諒闇

情在難奪方今務殷何得遂其志耶其以濤為吏郎尚書濤辭以喪病章表懇切會元后崩遂扶輿還洛逼迫詔命自力就職

臣按濤以至孝稱而奪情就職蓋亦習俗使然不自知其非禮者也

劉殷七歲喪父哀毀過禮服喪三年未曾見齒曾祖母王氏盛冬思堇而不言食不飽者一旬矣殷怪而問之王言其故殷時年九歲乃於澤中慟哭曰殷罪釁深重

幼丁艱罰王母在堂無旬月之養殷為人子而所思無
獲皇天后土願垂哀愍聲不絕者半日於是忽若有一
人云止止聲殷收淚視地便有堇生焉因得斛餘而歸
食而不減至時堇生乃盡又嘗夜夢人謂之曰西籬下
有粟寤而掘之得粟十五鍾銘曰七年粟百石以賜孝
子劉殷自是食之七歲方盡時人嘉其至性感通妻張
氏性亦婉順事王母以孝聞及王氏卒殷夫婦毀瘠幾
至滅性柩在殯而西隣失火風勢甚盛殷夫婦叩殯號

哭火遂越燒東家後有二白鳩巢其庭樹太傅楊駿輔政備禮聘殷殷以母老固辭優詔許終色養

王延九歲喪母泣血三年幾至滅性每至忌日則悲啼一旬繼母卜氏遇之無道恒以蒲穰及敗麻頭與延貯衣其姑聞而問之延知而不言事母彌謹卜氏嘗盛冬思生魚勅延求而不獲杖之流血延循汾叩凌而哭忽有一魚長五尺踊出水上延取以進母卜氏食之積日不盡於是心悟撫延如已生延事親色養夏則扇枕席

冬則以身溫被隆冬盛寒體無全衣而親極滋味州郡
禮辟貪供養不起父母終後廬於墓側

吳隱之年十歲丁父憂每號泣行人為之流涕事母孝
謹及其執喪哀毀過禮家貧無人鳴鼓每至哭臨之時
恒有雙鶴警叫及祥練之夕復有羣鴈俱集時人咸以
為孝感所致嘗食醵菹以其味旨掇而棄之與太常韓
康伯隣居康伯母每聞隱之哭聲輟飡投筯為之悲泣
既而謂康伯曰汝若居銓衡當舉此輩人及康伯為吏

部尚書隱之遂階清級

范粲遷武威太守以母老罷官郡既接近寇戎粲以重鎮輒去職朝廷尤之左遷樂涖令遭母憂以至孝稱子喬年二歲時祖馨臨終撫喬首曰恨不見汝成人因以所用硯與之至五歲祖母以告喬喬便執硯涕泣父粲陽狂不言喬與二弟並棄學業絕人事侍疾家庭至粲沒足不出邑里

傳祇性至孝早知名母憂去職及葬母詔給太常五等

吉凶導從其後諸卿夫人葬給導從自此始也

曹志魏陳思王植之孽子少好學以才行稱夷簡有大度植曰此保家之主也立以為嗣為散騎常侍遭母憂居喪過禮因此病篤

周虓瓊之子領梓潼太守苻堅將楊安寇梓潼虓固守涪城遣騎送母妻從漢水將抵江陵為堅將朱彤邀而獲之虓降於安堅以為尚書郎虓曰蒙國厚恩以至今日但老母見獲失節於此母子獲全秦之惠也雖公侯

之貴不以為榮況郎任乎堅乃止虢乃密書於桓冲說賊姦計大元三年潛至漢中堅追得之後又與堅兄子苞謀襲堅事泄堅引虢問其狀虢曰漸離豫讓燕智之微臣猶漆身吞炭不忘忠節況虢世荷晉恩豈敢忘也生為晉臣死為晉鬼復何問乎堅曰今殺之適成其名矣遂擿之徙於太原虢竟以病卒其子興迎致其喪詔曰虢厲志貞亮無愧古烈未及拔身奄隕厥命甄表義節國之典也贈龍驤將軍益州刺史

臣按琥以母故失節而其後箕踞不遜自投虎口
意其時老母已死也圖堅報晉自托於漸離豫讓
之儔可哀也已有子迎喪國典甄贈雖未拔身亦
克永世故有取焉

刁彛少遭家難王敦誅後彛斬讐人黨以首祭父墓詣
廷尉請罪朝廷特宥之

劉惔少清遠有奇標與母任氏寓居京口家貧織芒屨
以為養雖華門陋巷晏如也

諸葛恢祖誕魏司空為文帝所誅父靚奔吳為大司馬
吳平逃竄不出武帝與靚有舊靚姊又為瑯琊王妃常
知靚在姊間因就見焉靚逃於厠帝又逼見之謂曰不
謂今日復得相見靚流涕曰不能漆身髹面復睹聖顏
詔以為侍中固辭不拜歸於鄉里終身不向朝廷而坐
臣按靚之制行固有不可奪之志要其痛深創鉅
無日可忘非已甚也

殷仲堪父病積年仲堪衣不解帶躬學醫術究其精妙

執藥揮淚遂眇一目居喪哀毀以孝聞仲堪父常患耳聰聞牀下蟻動謂之牛鬪帝素聞之而不知其人從容問仲堪曰患此者為誰仲堪流涕而起曰臣進退惟谷帝有愧焉

仲堪為桓元所殺子簡之載喪下都葬於丹徒遂居墓側義旗建私率僮客隨義軍躡桓後卒報父仇

溫嶠平北大將軍劉琨妻嶠之從母也琨深禮之請為叅軍琨誠繫王室謂嶠曰今晉祚雖衰天命未改吾欲

立功河朔使卿延譽江南子其行乎對曰嶠雖無管張之才而明公有桓文之志欲建匡合之功豈敢辭命乃以為左長史奉表勸進初嶠欲將命其母崔氏固止之嶠絕裾而去其後母亡嶠阻亂不得歸葬苦請北歸詔三司八座議其事皆曰昔伍員志復私讐先假諸侯之力東奔闔閭位為上將然後鞭荆王之尸若嶠以母未葬沒在并土者乃應竭其智謀仰憑皇靈使逆寇冰消反哀墓次豈可稍以乖嫌廢其遠圖哉

臣按嶠之失不在於許琨以將命而在於不亟反命也使嶠哀祈以屢則絕裾之痛江左諸臣宜無不諒而許之者於時母未亡而琨亦未見害也何為濡遲宿留乎至於阻亂之後老母已死國恥私讐并在一身固應誓殲逆寇以慰聖善者也史臣曰忠臣本乎孝子奉上資乎愛親自家刑國於斯極矣太真字嶠性履深純譽流邦族始則承顏候色老萊勿之加也既而辭親蹈義申胥何以尚焉竟

能宣力王室揚名本朝負荷受遺繼之全節言念
主辱祇赴國屯微夫人之誠懇大盜幾移國乎臣
竊究嶠於君親之際先儒之論多異者要其忠勤
許國亦足顯揚母氏若終身以喪禮自處縱未得
反哀墓次亦可無恤於人言已

郅愔性至孝居父母憂殆將滅性

鄧攸七歲喪父尋喪母及祖母居喪九年以孝致稱

續咸性孝謹敦重履道貞素好學

徐邈遭父憂邈先患疾因哀毀增篤不踰年而卒年五十四長子諮有父風以孝聞

高崧父悝少孤事母以孝聞年十三值歲饑悝菜蔬不饜每致甘肥於母撫弟以友愛稱歷顯位封建昌伯崧少好學除太常博士父艱去職初悝以納妾致訟被黜崧乃自繫廷尉訟寃遂停喪五年不葬表疏數十上帝哀之乃下詔曰悝備位大臣違憲被黜事已久判其子嵩求直無已今特聽傳侯爵由是見稱

顧衆父祕交州刺史衆出後伯父早終事伯母以孝聞
祕卒交州人立衆兄壽為刺史尋為州人所害衆往交
州迎喪值杜弢之亂崎嶇六年乃還祕曾蒞吳興吳興
故舊以衆經離寇難共遺錢二百萬一無所受

陸暕字士光少有雅望從兄機每稱之曰我家世不乏
公矣居喪以孝聞同郡顧榮與鄉人書曰士光氣息纔
屬慮其性命言之傷心矣

謝尚幼有至性七歲喪兄哀慟過禮親戚異之十餘歲

遭父憂丹陽尹溫嶠弔之尚號咷極哀既而收涕告訴
舉止有異常童嶠甚異之時有遭亂與父母乖離議者
或以仕進理王事婚姻繼百世於禮非嫌尚議曰典禮
之興皆因循情理要當斷之以大義夫無後之罪三千
所不過今婚姻將以繼百世崇宗緒此固不可塞也然
至於天屬生離之哀父子乖絕之痛痛之深莫深於茲
夫以一體之小患猶或忘思慮損聽察況於抱傷心之
巨痛懷忉怛之至戚方寸既亂豈能綜理時務哉有心

之人決不冒榮苟進冒榮苟進之疇必非所求之旨徒
開偷薄之門而長流弊之路或有執志丘園而守心不
革者猶當崇其操業以弘風尚而況含艱履戚之人勉
之以榮貴耶

劉毅初丁憂在家及義旗初興遂墨經從事軍役漸寧
上表乞還京口以終喪禮曰弘道為國者理盡於仁孝
訴窮歸天者莫甚於喪親但臣在凡庸本無感槩不能
隕越固其宜耳往年國難滔天故志竭愚忠覲然苟存

去春鑾輿迴軫而狂狡未滅雖姦凶時梟餘燼竄伏威懷寡方文武勞獎微情未申顧景悲憤今皇威遐肅海內清蕩臣窮毒艱穢亦已具於聖聽兼羸患滋甚衆疾互動如今寢頓無復人理臣之情也本不甘生語其事也亦可以沒乞賜餘骸終其丘墳庶幾忠孝之道獲宥於聖世不許

臣按毅以即戎墨經事寧表乞終制其辭有可矜焉若乃專肆很愎以至於敗終昧於立身之義焉

次定四庫全書

御定考經衍義

御定孝經衍義卷八十

欽定四庫全書

御定孝經衍義卷八十一

卿大夫之孝

愛親

南史謝弘微為文學母憂去職居喪以孝稱服闋蔬食
踰時

胡藩少孤居喪以毀聞太守韓伯見之謂藩叔尚書少
廣曰卿此姪當以義烈成名

趙倫之幼孤貧事母以孝稱

臧燾為助教頃之去官以父母老家貧與弟燾俱棄人事躬耕自業約已養親者十餘年父母喪亡居喪六年以毀瘠著稱

臧盾有孝性嘗隨父宿直廷尉府母劉氏在宅夜暴亡盾左手中指忽痛不得寢及旦宅信果報凶問其感通如此服未終父卒居喪五年不出廬戶形骸枯瘁家人不識武帝累敕抑譬

王儉生而父僧綽遇害為叔父僧虔所養數歲襲爵豫寧縣侯拜受茅土流涕嗚咽選尚陽羨公主帝以儉嫡母武康主同泰初巫蠱事不可以為婦姑欲開冢離葬儉密以死請故事不行

臣按任昉為王儉集序云年六歲襲封豫寧縣侯拜日家人以公尚幼弗之先告既襲圭組對揚王命因便感咽若不自勝初宋明帝居藩與公母武康公主素不協及即位有詔毀廢舊塋投棄棺柩

公以死固請誓不遵奉表啓酸切太宗聞而悲之
遂無以奪也與本傳小異

王規八歲丁所生母憂居喪有至性齊太尉徐孝嗣每
見必為流涕稱曰孝童

謝朓年數歲所生母郭氏疾朓晨昏溫清勤容戚顏未
嘗暫改恐僕役營疾懈倦躬自執勞母為疾畏驚一家
尊卑感朓至性咸納屢行屏氣語如此者十餘年

謝幾卿父超宗徙越雋詔家人不得相隨幾卿年八歲

別父於新亭不勝其慟遂投於江超宗命估客數人入水救之良久湧出得就岸漚耳目口鼻出水數斗十餘日乃裁能言居父憂哀毀過禮

謝舉弱冠丁父憂幾致毀滅

王志九歲居所生母憂哀容毀瘠為中表所異

王筠普通元年以母憂去職筠有孝性毀瘠過禮

王銓學業不及弟錫而孝行齊焉時人以為銓錫二王可謂玉昆金友母長公主疾銓形貌瘠貶人不復識及

居喪哭泣無常因得氣疾錫弟僉八歲丁父憂容毀過禮累遷始興內史丁所生母憂固辭不拜

袁昂雍州刺史顗之子也初顗敗傳首建業藏於武庫以漆題顗名以為誌至是始還之昂號慟嘔血絕而復甦以淚洗所題漆字皆滅人以為孝感莫訖更制服廬於墓次從兄彖常撫視抑譬之以父亡不以理終身不聽音樂丁母憂哀毀過禮服未除而從兄彖卒昂幼孤為彖所養乃制期服丁所生母憂去職以喪還江路風

潮暴駭昂乃縛衣著柩誓同沉溺及風止餘船皆沒惟
昂船獲全咸謂精誠所致昂子君正年數歲父疾晝夜
不眠專侍左右家人勸令暫臥荅曰官既未差眠亦不
安

孔奐時天下喪亂皆不能終三年喪唯奐及吳國張種
在寇亂中守法度並以孝聞

蔡廓遭母憂性至孝三年不櫛沐殆不勝喪少子興宗
年十歲喪父哀毀有異凡童子搏丁母憂廬於墓側齊

末多難服闋因居墓所

張岱為司徒左西曹掾母年八十籍注未滿岱便去官
有司以岱違制將欲糾舉宋孝武曰觀過可以知仁不
須案也

張敷生而母亡年數歲問知之雖童蒙便有感慕之色
至十歲許求母遺物而散施已盡惟得一扇乃緘錄之
每至感思輒開笥流涕見從母悲感哽咽父在吳興亡
成服凡十餘日始進水漿葬畢不進鹽菜遂毀瘠成疾

伯父茂度每止譬之輒更感慟絕而復續茂度曰我冀
譬汝有益但更甚耳自是不復往末期而卒孝武即位
詔旌其孝道追贈侍中改其所居稱孝張里

裴子野生而母魏氏亡為祖母殷氏所養年九歲殷氏
亡泣血哀慟家人異之父寢疾彌年子野禱請備至涕
泗霑濡父夜夢見其容且召視如夢俄而疾間以為至
孝所感命著孝感傳固辭乃止及居喪每之墓所草為
之枯有白兔白鳩馴擾其側梁天監中尚書僕射范雲

嘉其至行將表奏之會雲卒不果

劉覽字孝智以所生母憂廬於墓常再期不嘗鹽酪食
麥粥而已隆冬止著單衣家人慮不勝喪中夜竊置炭
於牀下覽因暖得寐及覺知之號慟嘔血梁武帝聞其
至性數使省視

劉苞三歲而孤至六七歲見諸父常泣其母謂其畏憚
怒之苞曰早孤不及見父聞諸父多相似故心中悲耳
因而歔歔母亦悲慟初苞父母及兩兄相繼亡歿悉假

瘞焉苞年十六始移墓所經營改葬不資諸父奉大母
朱夫人及所生陳氏並扇席溫枕叔父繪常歎服之
夏侯詳年十六遭父艱居喪哀毀三年廬於墓側常有
三足雀來集其廬戶衆咸異焉子亶嗣居喪盡禮廬於
墓側遺財悉推諸弟

楊公則父仲懷為宋豫州刺史殷琰將叛輔國將軍劉
劬討琰仲懷力戰死於橫塘公則隨父在軍年未弱冠
冒陣抱屍號哭氣絕良久劬命還仲懷首公則斂畢徒

步負喪歸鄉里由此著名

劉懷慰父乘人死於義嘉事懷慰持喪不食醯醬冬日
不用絮衣養孤弟妹事寡叔母皆有恩義子霽十四居
父憂有至性每哭輒嘔血母胡氏寢疾霽年已五十衣
不解帶者七旬母亡霽廬於墓哀慟過禮常有雙白鶴
循翔廬側處士阮孝緒致書抑譬焉霽思慕不已未終
喪而卒

韋鼎遭父憂水漿不入口者五日哀毀過禮殆將滅性

侯景之亂鼎兄昂戰死京口鼎負屍出寄於中興寺求棺無所得鼎哀憤慟哭忽見江中有物流至鼎所竊異之往視乃新棺也因以充斂元帝聞之以為精誠所感馮道根少孤家貧傭賃以養母行得甘肥未嘗先食必遽還以遺母年十三以孝聞郡召為主簿不就曰吾當使封侯廟食安能為儒吏耶

張弘策幼以孝聞母嘗有疾五日不食弘策亦不食母強為進粥弘策乃食母所餘遭母憂三年不食鹽菜幾

至滅性兄弟友愛不忍暫離雖各有室常同臥起時人比之姜肱兄弟

馬仙琕父憂毀瘠過禮負土成墳手植松柏

陸襄為揚州從事以父終此官固辭武帝不許聽與府司馬換解居之襄母常卒患心痛醫方須三升粟漿時冬月日又逼暮求索無所忽有老人詣門貨漿量如方劑始欲酬直亡何失之時以襄孝感所致母憂去職襄已五十毀頓過禮

任昉孝友純至每侍親疾衣不解帶言與淚并湯藥飲食必先經口父喪去官泣血三年杖而後起齊武帝謂昉伯遐曰聞昉哀毀過禮使人憂之宜深相全譬遐使進飲食當時勉勵回即嘔出父遥本性重檟榔以為嘗餌臨終嘗求之剖百許口不得好者昉亦所嗜好深以為恨遂終身不嘗檟榔遭繼母憂昉先以毀瘠每一慟絕良久乃甦因廬墓側以終喪禮哭泣之地草為不生昉素強壯腰帶甚充服闋後不可復識

王固清虛寡欲居喪以孝聞及丁所生母憂遂終身蔬食

許懋少孤性至孝居父憂執喪過禮為州黨所稱

賀琛家貧常往還諸暨販粟以養母雖自執舟楫閒則習業俄遭母憂廬於墓所服闋猶未還舍生徒復從之琛哀毀積年骨立而已未堪請授諸生營救稍稍習業陸瓊年十一丁父憂毀瘠有至性從祖襄歎曰此兒必荷門基初瓊之侍東宮母隨在官舍及喪還鄉詔加贈

後主自制誌銘朝野榮之瓊哀慕過毀以至德四年卒
庾杲之幼有孝行清貧自業

徐陵弟孝克性至孝遭父憂殆不勝喪事所生母陳氏
盡就養之道後為國子祭酒孝克每侍宴無所食噉至
席散當其前膳羞損減帝密記以問中書舍人管斌斌
自是伺之見孝克取珍果納紳帶中斌當時莫識其意
後尋訪方知其以遺母斌以啓宣帝嗟嘆良久乃敕自
今享宴孝克前饌並遣將還以餉其母時論美之皇太

子入學釋奠百司陪列孝克發孝經題後主詔皇太子
北面致敬陳亡隨例入長安家道壁立所生母患欲粳
米為粥不能常辦母亡後孝克遂常啗麥有遺粳米者
孝克對而悲泣終身不復食焉

臣按陵奉使在北侯景寇京師陵父先在圍城之
內陵不奉家信便蔬食布衣若居憂恤其致僕射
楊遵彥書云吾奉違溫清仍屬亂離蕭軒靡御王
舫誰持瞻望鄉關何心天地自非生憑廩竹源出

空桑行路含情猶共相愍盖亦孝子之情也

吳明徹父樹梁右軍將軍明徹幼孤性至孝年十四感墳塋未修家貧無以取給乃勤耕種天下亢旱苗稼焦枯明徹哀憤每之田中號泣仰天自訴居數日有自田還者云苗已更生明徹疑其紿已及往如言秋而大獲足充葬用時有伊氏者善占墓謂其兄曰君葬日必有乘白馬逐鹿者經墳此是最小孝子大貴之徵至時果有應明徹即樹之小子也

魯悉達幼以孝聞遭母憂哀毀過禮因遘疾卒謚孝侯
虞荔母隨荔入臺卒於臺內尋而城陷情禮不申由是
終身蔬食布衣不聽音樂帝以蔬食積久非羸疾所堪
乃敕曰卿年事已多氣力稍減方欲委良須充壯今
給卿魚肉不得固從所執荔終不從

陶季直五歲喪母哀若成人初母未病令於外染衣卒
後家人始贖季直抱之號慟聞者莫不酸感

成景雋父安樂淮陽太守常邕和殺安樂以城內附景

雋謀復讐因殺魏宿預城主以地南入邕和為鄱陽內
史景雋購人刺殺之重購邕和家人鳩殺其子雋類俱
盡武帝義之每為屈法景雋家讐既雪每思報効卒諡
忠烈云

謝蘭丁父憂晝夜慟號毀瘠骨立母阮氏常自守視譬
抑之後為散騎常侍使魏會侯景入附境上交兵蘭母
既慮不得還感氣而卒及蘭還入境夜夢不祥旦便投
列馳歸及至號慟嘔血氣絕久之水漿不入口每哭眼

耳口鼻皆血流經月餘日因夜臨而卒子貞有至性祖母阮氏先苦風眩每發便一二日不能飲食貞時年七歲祖母不食貞亦不食往往如此十四丁父艱號頓於地絕而復蘇者數矣初貞父藺以憂毀卒家人賓客復憂貞乃共請華嚴寺長爪禪師為貞說法仍譬以母須侍養不宜毀滅乃進饘粥及魏克江陵入長安貞母出家於宣明寺貞在周侍武帝愛弟趙王招讀招聞其獨處必晝夜涕泣私問知母在鄉後數年奏放貞還母憂

哀毀羸瘠病篤卒

姚察初梁室淪沒察父僧坦入長安察蔬食布衣不聽音樂至是凶問因聘使到江南時察母韋氏喪制適除後主以察羸瘠慮加毀頓乃密遣中書舍人司馬申就宅發哀仍敕申專加譬抑察累居憂戚齊素日久因加氣疾後主常別召見為之動容陳亡入隋襲封北絳郡公察在陳時聘周因得與父僧坦相見將別之際絕而復甦至是承襲愈更悲戚見者莫不為之歔歔丁後母

杜氏喪解職在服制之中有白鳩巢於戶上

殷不害性至孝居父憂過禮由是少知名家世儉約居甚貧窶有弟五人皆幼弱不害事老母養小弟勤劇無所不至簡文以不害善事親賜其母蔡氏錦裙襦氎席被褥單復畢備魏平江陵失母所在時甚寒雪凍死者填滿溝壑不害行哭尋求聲不暫輟過見死人溝中即投身捧視舉體凍僵水漿不入口者七日始得母屍憑屍而哭每輒氣絕行路皆為流涕即江陵權殯入長安

自是蔬食布衣枯槁骨立見者莫不哀之弟不佞居父喪以至孝稱會魏尅江陵而母卒道路隔絕久不得奔赴四載之中晝夜號泣居處飲食常為居喪之禮第四兄不齊於江陵迎母喪柩歸葬不佞居處之節如始聞問若此者又三年手自負土植松柏每歲時伏臘必三日不食

司馬嵩有至性年十二丁內艱哀慕過禮水漿不入口殆經一旬每號慟必至悶絕父每喻之令進粥然猶毀

瘠骨立丁父艱哀毀愈甚廬於墓側日進麥粥一升墓
在新林連接山阜舊多猛獸曷結廬數載豺狼絕跡常
有兩鳩栖宿廬所馴狎異常子延義初隨父入闕丁母
憂喪過於禮及曷還都延義乃躬負靈櫬晝伏宵行冒
履冰霜手足皸瘃至都遂致孿廢數年乃愈

李慶緒父為人所害慶緒九歲而孤為兄所養日夜號
泣志在復讐投州將陳顯達仍於部伍白日手刃其仇
自縛歸罪州將義而釋之梁天監中為東莞太守丁母

憂去職廬於墓側每慟嘔血數升

北史穆紹歷位祕書監侍中衛將軍太常卿中書令七
兵殿中二尚書遭所生母憂免居喪以孝聞

長孫晟性至孝居憂毀瘠為朝士所稱

王晞幼而孝謹淹雅有器度好學不倦魏永安初第二
兄暉聘梁啓晞釋褐除員外散騎侍郎徵署廣平王開
府功曹晞願養母竟不受弟皓少立名行為士友所稱
遭母憂居喪有至性

崔瞻聘陳行過彭城讀道傍碑未畢而絕倒從者遙見
以為中惡此碑乃瞻父悽徐州時所立故哀感焉悽弟
仲文有文學沙苑之敗仲文持馬尾渡河波中乍沒乍
出神武望見曰崔掾也遽遣船赴接及至謂曰卿為君
為父不顧萬死可謂家之孝子國之忠臣也

閻元明少而至孝行著鄉閭太和五年除北隨郡太守
元明以違離親養興言悲慕母亦慈念泣淚喪明悲號
上訴許歸奉養一見其母母目便開刺史呂壽恩列狀

上聞詔下州郡表為孝門復其租調兵役令終母年母亡服終心喪積載每忌日悲動傍鄰

臣按元明之母一見其子瞽目復明所謂誠孝之感無所不通也

楊慶祖元父剛並以至孝知名年二十五郡察孝廉以侍養不赴母有疾不解襟帶者七旬及居母憂哀毀骨立負土成墳齊文宣表其門閭賜帛及綿粟有差隋文帝屢加褒賞擢授儀同三司為平陽太守

李崇祖伯貴魏宣武時官至魯郡守有孝行居父喪哀戚過禮遂以毀卒宣武嘉之贈渤海相

盧義僖九歲喪父便有至性少為僕射李冲所歎美卒

謚曰孝簡

宇文福子延位員外散騎侍郎以父老詔聽隨侍在瀛洲屬大乘妖黨突入州城延率奴客逆戰身被重創賊縱火燒齋閣福時在內延突火入抱福出外支體灼爛鬚髮盡焦於是勒衆與賊苦戰賊乃散走以此見稱

宋隱性至孝專精好學積遷行臺右丞領選尋以母喪

歸列人

地名

既葬被徵乃棄妻子匿於長樂數年而卒隱

弟宣宣子謨謨子鸞鸞弟瓊以孝稱母曾病季秋月思
瓜瓊夢想見之求而遂獲時人異之

臣按宋瓊因夢想而果獲瓜亦誠孝之所感也

刁柔居母喪以孝聞

辛紹先有至性丁父憂三年口不甘味頭不櫛沐髮遂

落盡

賈彞父為苻堅鉅鹿太守坐訕謗繫獄彞年十歲訟父獲申遠近歎之彞從兄潤潤曾孫禎居喪以孝聞使江左還以母老患病輒在家定省坐免官

韋閭子範範子雋少孤事祖母以孝聞子粲兄弟十三人並有孝行居父喪毀瘠過禮既葬廬於墓側負土成墳

陸卬父憂兄弟交相率廬於墓側負土成墳朝廷所嗟尚發詔褒揚改其所居為孝居里服竟當襲不忍嗣侯

遭母喪哀慕毀悴殆不勝喪遂至沈篤頓伏牀枕又成風疾第五弟搏遇疾臨終謂其兄弟曰大兄尫病如此性至慈愛搏之死日必不得使大兄知之哭泣聲必不可聞徹致有感動家人至於祖載方始告印聞而悲痛一慟便絕搏弟彥師父艱去職哀毀殆不勝喪與兄印廬於墓次鄉人重之皆就墓側存問晦朔之際車馬不絕兄印當襲父始平侯以彥師昆弟中最幼表讓封焉彥師固辭而止世稱友弟孝義總萃一門

陸侯子麗興安初封平原王麗頻讓不聽乃啓以讓父
文成曰朕為天下主豈不能得二王封卿父子也以父
侯為東平王麗好學愛士常以講誦為業甚孝遭父憂
毀瘠過禮

蕭祇子放居喪以孝聞所居廬室前有二慈烏來集各
據一樹為巢自午以前馴庭飲啄午後更不下樹每臨
時舒翅悲鳴全似哀泣家人伺之未嘗有闕時以為至
孝之感

蕭大園幼而聰敏年四歲能誦三都賦及孝經論語七
歲居母喪便有成人性

盧叔仁年十八州辟主簿舉秀才除員外郎以親老乃
辭歸就養父母既沒哀毀六年躬營墳隴有終焉之志
崔仲哲早喪所生母為祖母宋氏所養六歲宋亡啼慕
不止見者悲之以軍功賜爵安平縣男及父秉於燕被
圍泣訴朝廷遂除別將與都督元譚赴援戰歿

李渾以父死王事除給事中後以四方多難求為青州

征東司馬與河間邢邵北海王昕俱奉老母攜妻子同
赴青齊未幾而爾朱榮入洛衣冠殲盡物論以為知幾
天平初丁母憂行喪冢側殆將滅性

裴佗子讓之年十六喪父殆不勝哀其母辛氏泣撫之
曰棄我滅性得為孝乎由是自勉

裴俠年十三遭父憂哀毀有若成人將擇葬地而行空
中有人曰童子何悲葬於桑東封公侯俠懼以告其母
母曰神也吾聞鬼神福善爾家未嘗有惡當以吉祥告

汝耳時俠宅有大桑林因葬焉後賜爵清河縣伯以功
進爵為侯子祥性忠謹俠之終也以毀卒

李平頻經大憂居喪以孝稱

傅永父母並老飢寒十數載賴其強於人事勩力傭丐
得以存立

斛斯徵有至性居父喪朝夕共一溢米

元文遙父晞有孝行父卒廬於墓側而終文遙貴贈特
進開府儀同三司中書監謚曰孝

魏蘭根母憂居喪有孝稱父喪廬於墓側負土成墳憂毀殆於滅性次子敬仲敬仲子餉幼孤學涉有時譽居喪以孝聞

裴駿子修早孤居喪以孝聞二弟三妹並在幼弱撫養訓誨甚有義方次第務早喪修哀傷之感於行路愛育孤姪同於己子及將異居奴婢田宅悉推與之時人以此稱焉修弟宣少孤事母兄以孝友稱

李崇以父賢勲封迴樂縣侯時年尚小拜爵日親族相

賀崇獨泣下賢問之對曰無勲於國幼少封侯當報主恩不得終於孝養是以悲耳賢由此大奇之

王誼父艱毀瘁過禮廬於墓側負土成墳

竇熾事親孝奉諸兄以悌聞

柳檜安康人黃衆寶謀反圍檜郡城陷身被十餘創遂為賊所獲檜守節不變遂害之子雄亮時年十四哀毀過禮陰有復讐之志武帝時衆寶率其部歸長安雄亮手斬衆寶於城中請罪闕下帝特原之

柳慶出後第四叔及遭父憂議者不許為服重慶泣曰
禮緣人情若於出後之家更有苴斬之服可奪此從彼
今四叔薨背已久情事不追豈容奪禮乖違天性時論
不能抑遂以苦塊終喪既葬乃與諸兄負土成墳慶兄
檜為賊黃衆寶所害檜子三人皆幼弱慶撫養甚篤後
檜次子雄亮白日手刃衆寶於長安城中晉公護聞而
大怒執慶諸子姪皆囚之讓慶擅殺人對曰慶聞父母
之讐不同天昆弟之讐不同國明公以孝臨天下何責

於此乎護愈怒慶辭色無屈竟以俱免

若干惠早喪父事母以孝聞周文嘗造射堂新成與諸將宴射惠竊歎曰親老矣何時辦此周文聞之即日從堂於惠宅

劉亮以母憂去職居喪毀瘠周文歎其至性

蔡祐年十四事母以孝聞

田德懋少以孝友知名丁父艱哀毀骨立廬於墓側負土成墳帝聞而嘉之遣員外散騎侍郎元志就弔焉復

降璽書存問下詔表其閭

韋祐父沒事母以孝聞

泉公九歲喪父哀毀類於成人

柳敏九歲而孤事母以孝聞遭母憂居喪旬日之間鬢髮半白尋起吏部郎中毀瘠過禮杖而後起周文見而歎異之特加稟賜

申徽少與母居盡力孝養

陸政性至孝其母吳人好食魚北土魚少政求之常苦

難後宅側忽有泉出而有魚遂得以供膳時人以為孝感所致因謂其泉為孝魚泉

趙和太平中陵江將軍南討度淮聞父喪輒還所司將致之於法和曰罔極之恩終天莫報若許安厝禮畢而即罪戮死且無恨言訖號慟悲感傍人主司以聞遂宥之

宗慄遭母憂去職哭輒嘔血兩旬之內絕而復蘇者三每旦有羣鳥數千集於廬舍候哭而來哭止而去時論

以為孝感所致

柳遐有至行初為州主簿其父卒於揚州遐自襄陽奔赴六日而至哀感行路毀瘁不可識後奉喪西歸中流風起舟人相顧失色遐抱棺號慟天求哀俄頃風止浪息其母嘗乳間發疽醫云此疾無可救理唯得人吮膿或望微止其痛遐應聲即吮旬日遂瘳咸以為孝感所致

趙嘏少孤養母至孝年十四有人盜伐其父墓中樹者

哭對之號慟因執送官見魏右僕射周惠達長揖不拜
自述孤苦涕淚交集惠達為之隕涕歎息者久之

元壽少孤性仁孝九歲喪父哀毀骨立宗族鄉黨咸異
之事母以孝聞

王頒父僧辯平侯景留頒荊州梁元帝為周師所陷頒
因入闕聞其父為陳武帝所殺號慟而絕食頃乃蘇哭
不絕聲毀瘠骨立至服闋常布衣蔬食藉藁而臥隋開
皇初獻取陳之策及大舉伐陳頒自請行率兵數百人

從韓擒虎先鋒夜濟力戰被傷恐不堪復鬪悲感嗚咽
夜中睡夢有人授藥比寤而瘡不痛時人以為孝感及
陳滅頌召父在時士卒得千餘人對之涕泣其間壯士
或問曰郎君讐恥已雪而悲哀不止者將不為霸先早
死不得手刃之耶請發其丘隴斲櫬焚骨亦可申孝心
矣頌頓顙陳謝額盡流血荅曰其為墳塋甚大恐一宵
發掘不及其屍更至明朝事乃彰露諸人請具鍬鍤於
是夜發其陵剖棺見陳武帝鬚皆不落其本皆出自骨

中頒遂焚骨取灰投水飲之既而自縛歸罪文帝以頒所為亦孝義之道舍而不問有司錄其戰功頒固辭曰臣緣國威靈得雪怨恥本徇私心非是為國所加官賞終不敢當帝從之

梁彥光少岐嶷有至性其父每謂所親曰此兒有風骨當興吾宗七歲時父遇篤疾醫曰餌五石可愈時求紫石英不得彥光憂瘁不知所為忽於園中見一物彥光所不識怪而持歸即紫石英也親屬咸異之以為至孝

所感累遷小馭下大夫母憂去職毀瘠過禮起令視事
帝見其毀甚嗟嘆久之

邢蚪為光祿少卿母在鄉遇患請假歸遇秋水暴漲河
梁破絕蚪得一小船而渡船漏滿不沒時人異之母喪
哀毀過禮為時所稱


邢邵除衛將軍國子祭酒以親老還鄉詔所在特給兵
力五人并令歲一入朝以備顧問丁母憂哀毀過禮

李諧子岳官中散大夫性純至居期慘未曾聽婢過前

追思二親言則流涕

陽固丁母憂號慕毀疾杖而能起練禫之後酒肉不進時固年踰五十而喪過於哀鄉黨親族咸歎服焉

臣按王頌剖陳武帝棺焚骨取灰與伍員鞭平尸意同此皆孝思忿激而成故隋文亦不之罪也至梁彥光得紫石英以愈親疾柳遐奉喪歸卒遇風不覆天實有以助成云



御定孝經衍義卷八十一

欽定四庫全書

子部

御定孝經衍義卷八十二

詳校官中書_臣羅錦森

編修_臣倉聖脈覆勘

總校官檢討_臣何思鈞

校對官修撰_臣陳初哲

謄錄監生_臣高瑞相

欽定四庫全書

御定孝經衍義卷八十二

卿大夫之孝

愛親

唐溫大雅性至孝與弟彥博大有皆知名薛道衡見之
歎曰三人者皆卿相才也後封黎國公改葬其祖卜人
占其地曰弟則吉不利於君若何大雅曰如子言我舍
笑入地矣歲餘卒諡曰孝彥博子振居喪以毀卒

高士廉子履行居母喪毀甚太宗諭使彊食襲爵許國公

竇抗父榮定為隋洛州總管陳國公母隋文帝姊安成公主也侍父疾束帶五旬不弛居喪哀癯過常母卒數號絕詔宮人節哭

薛萬備有至行居母喪廬墓前太宗詔表異其門仕至左衛將軍

王珪孫燾性至孝為徐州司馬母有疾彌年不廢帶視

絮湯劑數從高醫遊遂窮其術因以所學作書號外臺
祕要討繹精明世寶焉

薛收隋內史侍郎道衡子也以父不得死于隋不肯仕
房元齡言之秦王後從平劉黑闥封汾陰縣男子元超
九歲襲爵高宗即位轉中書舍人弘文館學士省中有
盤石道衡為侍郎時常據以草制元超每見輒泣然流
涕

陳叔達陳宣帝子少封義陽王武德初封江國公嘗賜

食得葡萄不舉帝問之對曰臣母病渴求不能致願歸奉之帝流涕曰卿有母遺乎因賜之又賚物百段貞觀初居母喪又有疾太宗憂之遣使禁卻弔者

褚無量母喪廬墓左鹿犯所植松柏無量號訴曰山林不乏忍犯吾塋樹耶自是羣鹿馴擾不復振觸無量為終身不御其肉

劉延祐子知柔居親喪廬墓側詔築闕表之

虞世南出繼叔陳中書侍郎寄之後父荔卒世南毀不

勝喪文帝遣使至其家護視寄陷於陳寶應世南雖服除衣布飯蔬寄還乃釋布啖肉宇文化及弑煬帝間殺其兄世基而世南抱持號訴請代不能得自是哀毀骨立

李百藥名臣子才行世顯為天下推重侍父母喪還鄉徒跣數千里服雖除容貌癯瘠者累年貶桂州遇盜將加以刃子安期跪泣請代盜哀釋之

阿史那忠居父喪哀慕過人

王方翼祖裕尚同安大長公主方翼早孤哀毀如成人時號孝童母李為主所斥居鳳泉墅方翼尚幼雜庸保執苦不棄日墾田植樹治林垠墜完墻屋燎松丸墨為富家主薨還京師居母喪哀瘠甚帝遣侍醫療視

崔從少孤貧與兄能偕隱太原山中母喪兄弟廬墓手藝松柏喪闋不應辟命

陳集原父為欽州刺史有疾集原即不食及亡嘔血數升即塋作廬盡以田貲讓兄弟里人高之武后時歷右

豹韜衛大將軍

李日知神龍初為給事中母老病調侍數日鬚髮輒白
母未及封而平方葬吏乃齎贈制日知殞絕于道左右
為泣莫能視巡察使路敬潛欲表其孝使求狀辭不報
劉禕之父子翼在隋為著作郎貞觀初召之以母老詔
許終養江南道巡察使李襲譽嘉其孝表所居為孝慈
里

李乾祐母卒廬墓側負土成墳帝遣使就弔表異其閭

韓思復祖倫封長山縣男思復少孤年十歲母為語父
亡狀感咽幾絕故倫特愛之嘗曰此兒必大吾宗後襲
祖封轉汴州司戶親喪去官鬻薪自給官至太子賓客
卒謚曰文天子親題其碑曰有唐忠孝韓長山之墓

高季輔居母喪以孝聞兄元道仕隋為汲縣令縣人反
城應賊殺元道季輔率其黨與縣人戰禽之斬首以祭
賊衆畏服

劉德威閨門和睦為人寬平生所得俸祿以分宗親

無留藏子審禮少喪母為祖母元所養隋末亂道不通
審禮尚少自鄉里負祖母渡江轉側避地及天下平西
入長安元每疾病必親煮藥嘗而進元曰兒孝通幽顯
吾一顧念疾輒間貞觀中歷左驍衛郎將父喪免比葬
徒跣血流行路咨歎服除當襲爵讓其弟不聽見父執
必感泗滂沱事繼母尤謹與弟延景為聞友得祿多資
之而妻子執寒苦宴如也羣從皆同居合二百口內外
無間言後與吐蕃戰敗被執特詔其子易從省之既至

而審禮卒易從晝夜哭不止吐番哀其志乃還父尸徒
跣萬里扶護以歸見者流涕

張士衡九歲居母喪哀慕過禮博士劉軌思見之為泣
下奇其操謂其父文慶曰古不親教子吾為君成就之
乃授以詩禮

路敬淳父逸遇隋季大亂闔門死于盜逸遁免流離辛
苦自傷家多難閉口不食行者哀其窮強飲食之更負
以行乃得脫敬淳少志學足不履門居親喪倚廬不出

者三年服除號慟入門形容癯毀妻不之識

張九齡居父喪哀毀庭中木連理母喪毀不勝哀有紫芝產坐側白鳩白鵲巢家樹子極居父喪有節行

畢構居親喪毀棘甚已除猶屏處丘園始構喪繼母而二妹襁褓身鞠養至成人妹為構服三年弟相留司東都聞疾馳歸哀毀如大喪雖變服未嘗笑天下稱其友悌

李朝隱授岐州刺史母喪解召為揚州大督府長史固

辭見聽時年已衰而篤于孝自致毀瘠士人以為難

李光弼終父喪不入妻室事繼母至孝

郭子儀居喪以禮疾甚或勸茹葱薤終不屬口

來瑱拾遺張鎬薦瑱能斷大事有禦侮才擢潁川太守
充招討使會母喪免以孝聞

路隋父泌從渾瑊會盟平涼為吐蕃所執死焉時隋方
嬰孺以恩授八品官逮長日夜號泣坐必西嚮不食肉
母告以貌類泌者終身不引鏡元和中吐蕃款塞隋五

上疏請修好冀得泌還詔可遣禮部郎中徐復報聘而泌以喪至帝愍惻贈絳州刺史官為治喪

楊炎祖哲以孝稱父播退居求志棄官歸養炎父喪廬墓側號慕不廢聲有紫芝白雀之祥詔表其閭炎三世孝行聞至門樹六闕古所未有

呂向生父岌客遠方不還少喪母失墓所在將葬巫者求得之不知父存亡招魂合諸墓後有傳父猶在者訪索累年不獲他日自朝還道見一老人物色問之果父

也下馬抱父足號慟行人為流涕帝聞咨歎官爰朝散
大夫賜錦綵給內教坊樂工娛其心卒贈東平太守
杜讓能喪母以孝聞

王維資性孝友母喪毀幾不生表輞川第為寺終葬其
西

鄭潛曜母代國長公主主寢疾潛曜侍左右造次不去
累三月不齟面刺血為書請諸神丐以身代火書而神
許二字獨不化翼日主愈戒左右無敢言

趙憬志行峻極母喪免官有芝生壤樹

獨孤及子郁郁子庠喪父始十歲有至性聞呼父官及
弔客來輒號痛幾絕仕至尚書丞

李遜弟建母憐其孝每字之曰倭子勸吾食吾輒飽進
藥吾意其瘳

奚陟少篤志通羣書諫大夫崔河圖持節使吐蕃表陟
自副以親老辭不拜居親喪毀瘠過禮

崔衍繼母李不慈父倫自吐蕃歸李敝衣以見問故曰

衍不吾給倫怒召衍將袒而鞭之衍涕泣無所陳倫弟
殷趨白衍所稟舉送夫人尚何云倫悟由是譖無所入
父卒事李益謹

韓皋父喪德宗遣使弔問俾論謨滉

皋父名

行事號泣承

命立草數千言以進帝嘉之皋貌類父既孤不復視鑑
高霞寓其先五代不異居孝聞里閭德宗採訪使洪經
綸言之詔表闕于門

韋處厚事繼母以孝聞親歿廬墓終喪

韋倫居家以孝慈稱

郭承嘏居母喪以孝聞

第五琦子峰婦鄭皆以孝著表闕于門

段秀實六歲母疾母不勺飲秀實亦不食至七日病間乃肯食時號孝童

李晟幼孤奉母孝有子十五人憲與勲于諸子最號仁孝

柳歲年十二居父喪為身孝

張孝忠性寬裕事親孝

權德輿七歲居父喪哭踊如成人

伊慎喪母將合葬而不知父墓晝夜哭夢若有尊者既發之舊志可按也乃得葬

馮宿父子華廬親墓有靈芝白兔號孝馮家宿弟定居喪號毀甚故數移疾

李紳六歲而孤哀等成人葬母有烏銜芝墜轎車

周墀少孤事母孝

賈直言父道冲以藝待詔代宗時坐事賜鵠將死直言
紿其父曰當謝四方神祇使者少怠輒取鵠代飲迷而
踣明日毒潰足而出久乃蘇帝憐之減父死俱流嶺南
直言由是蹙

殷踐猷以叔父喪哀慟嘔血而卒少子寅病且死以母
蕭老不忍訣及斂其子亮斷指剪髮置棺中自誓事祖
母如寅在其後侍蕭疾不脫衣者數年有白燕巢其楣
後終給事中杭州刺史

丁公著三歲喪母甫七歲見隣媪抱子哀感不肯食稍長父勉勅就學授集賢校書郎不滿秩輒去侍養于家父喪負土作冢貌力癯瘠見者憂其死孝觀察使薛平表上至行詔刺史弔問賜粟帛旌闕其閭

崔元亮父喪客高郵臥苫終制地下濕因得痺病不樂進取

高郢父伯祥為好畤尉安祿山陷京師將殺之郢尚幼解衣請代賊義而并貸之

李藩居父喪家本饒財姻屬來弔有持去者未嘗問
杜兼從弟羔有至性父死河北母更兵亂不知所之羔
憂號終日及兼為澤潞判官鞠獄有媼辯對不凡乃羔
母因得奉養而不知父墓區處晝夜號慟它日舍佛祠
觀柱間有文字乃其父臨死記墓所在羔奔往亦有耆
老識其壠因是乃得葬

牛徽父蔚避地于梁道病徽與子扶籃輿歷閣路盜擊
其首血流面持輿不息盜迫之徽拜曰人皆有父今親

老而疾幸無駭驚盜感乃止及前途又逢盜輒相語曰
此孝子也共舉輿舍之家進帛裹創以饘飲奉蔚留信
宿去抵梁徽趨蜀謁行在丐歸侍親疾會拜諫議大夫
固辭見宰相杜讓能曰上遷幸當從親有疾當侍而徽
兄在朝廷身乞還營醫藥時兄循已位給事中許之
竇羣母卒齧一指置棺中廬墓次

路巖父羣字正夫性至純潔親沒終身不食肉

孔述睿少與兄充符弟克讓篤孝已孤偕隱嵩山

羅珣子讓父喪幾毀滅服除布衣糲飯不應辟署十餘年

符令奇為盧龍軍裨將會幽州亂挈子璘奔昭義節度
薛嵩嵩卒田承嗣盜其地田悅拒命馬燧敗之洹水令
奇密語璘吾觀田氏覆亡無時汝能委質朝廷為唐忠
臣吾亦名揚後世矣璘俯泣不能對與父啗臂別乃以
衆降燧悅怒引令奇切讓令奇曰爾忘義背主旦夕死
吾教子以順殺身庸何悔臨刑色不變燧署璘為軍副

詔拜特進封義陽郡王既聞父見害號絕泣血璘母匿里中獨免及悅死詔迎於魏賜宴別殿

楊收七歲而孤處喪若成人

五代王仁鎬周世宗時拜安國軍節度制曰眷惟襄國實卿故鄉仁鎬省其父祖之基周視松楸涕泗嗚咽謁所親曰仲由以為不如負米之樂信矣時人美之

張昭性至孝長興中丁內艱明宗聞其居喪哀毀賜以錢幣開寶中封陳國公

李濤慷慨有大志以經綸為已任居家以孝友聞

宋邊光範性至孝母病疽光範常吮之

石熙載事繼母牛氏以孝聞弟熙導牛氏前夫子隨母
歸石氏以熙載故奏補殿直從弟熙古幼弟熙正皆登
進士第熙載撫之如一

李穆性至孝母常臥疾每動止轉側皆親自扶掖乃稱
母意後穆坐秦王事屬吏其子惟簡給祖母以穆奉詔
鞠獄臺中及責授為省郎還家亦不以白母每隔日陽

為入直即訪親友或游僧寺免歸暨於牽復母終弗之知及居喪思慕以至滅性

錢若水事繼母以孝聞

陳恕事母孝母亡哀慕過甚不食葷茹遂至羸瘠

顏衍晉祖時官河陽節度副使得家問父在青州有風痺疾衍不奏棄官去侍疾不復有仕宦意歲餘父疾不能起衍親自掬矢未嘗少倦後丁父憂哀毀甚俄召為駕部郎中鹽鐵判官以母老懇辭開運末召拜御史中

丞復抗表求侍養改戶部侍郎又堅乞罷免詔書褒許
即與其母東歸

臣按古之人臣往往以養親之故至于棄官不待
奏請當時不以為罪而常加褒擢教孝即所以勸
忠無異道也

高防父從慶戍天井關與梁軍戰死防年十六護柩以
歸事母孝好學

張藏英後唐末舉族為賊孫居道所害藏英年十七僅

以身免後逢居道于幽州市引佩刀刺之不死為吏所執節帥趙德鈞壯之釋不問以補牙職藏英後因居道避地關南乃求為關南都巡檢使至則微服攜鐵櫪匿居道舍側伺其出擊之仆于地齧其耳噉之遂禽歸設父母位陳酒肴縛居道于前號泣鞭之鬻其肉經三日剗其心以祭即詣官首服官為上請而釋之燕薊間目為報讐張孝子

慎知禮太平興國中知興元府母年八十餘居宛丘懇

乞歸養退處十年縉紳稱其孝

楊礪建隆中舉進士甲科父喪絕水漿數日服除以祿不足養母間居無仕進意鄉舊移書敦諭礪乃赴官解褐鳳州團練推官歲餘又以母疾棄官

宋湜早孤與兄泌勵志篤學事母以孝聞

孫奭性方重事親篤孝父亡舐其面以代頻

任中正事親孝母入謁禁中與陳彭年王曾張知白妻同見真宗命中正母為班首恩賜坐

周起父意知衛州坐事削官起年十三詣京師訟父寃
父乃得復故官

高若訥因母病遂兼通醫書雖國醫皆屈伏

范廷召父鐸為里中惡少年所害廷召年十八手刃父
讐剖取其心以祭父墓

郭達為環慶兵馬都監遭母憂不得解官凡三請乃許
慶帥杜杞贐以錢四十萬謝弗受

臣按達不以金革廢禮可謂賢矣其弗受贐也不

愛官豈愛錢乎

王駿七歲喪父哀毀過人

李諮幼有至性父文捷出其母諮日夜號泣食飲不入
口父憐之而還其母遂以孝聞舉進士真宗顧左右曰
是能安其親者擢第三人

張觀拜左丞丁父憂哀毀過人既練而卒觀性至孝初
為祕書郎其父居業方為州從事因上書願以官授父
真宗嘉之以居業為京官及觀貴居業由恩至太府卿

常過洛嘉其山川風物曰吾得老于此足矣觀于是買田宅營林榭以適其意早起奉藥膳然後出視事未嘗一日廢也

趙師民幼喪父哀感不畜婢妾年四十四始婚

楊察幼孤母頗知書常自教之敏于屬文

查道母常病思鰈羹方冬苦寒市之不獲道泣禱于河鑿冰取之得鰈尺許以饋母疾尋愈後數年母卒絕意名宦

彭乘進士及第嘗與同年生登相國寺閣皆瞻顧鄉關
有從宦之樂乘獨西坐悵然曰親老矣安敢舍晨昏之
奉而圖一身之榮乎翼日奏乞侍養乘父卒既葬有甘
露降于墓柏以為孝感

司馬池舉進士當試殿庭而報母亡友匿其書池心動
夜不能寐曰吾母素多疾家豈無有異乎行至宮城門
徘徊不能入因語其友止以母疾告遂號慟而歸
王鼎事繼母孝教育孤姪甚至

姚仲孫早孤事母孝後權三司使出知蔡州因母憂喪
一目卒

李虛已父寅為衢州司理叅軍母老棄官歸虛已後知
遂州以南郊恩封羣臣母妻虛已請罷其妻封以授祖
母詔悉封之世以為榮虛已遷屯田員外郎以便親請
通判洪州時寅已謝歸春秋高寅母尚無恙虛已雙舉
迎侍

陳琰丁父憂哀毀墳木連理

郭稹幼孤母邊更嫁王氏既而母亡稹解官服喪知禮院宋郊言稹服喪為過禮詔下有司博議用馮元等奏聽解官申心喪

臣按喪出母非禮也然可以愧世之不執親喪者馮元之議折衷而歸厚亦可以救世夫世俗之薄也不宜喪而喪不猶愈于宜喪而不喪者乎

賈黯知襄州迎父之官父有故人在部中遣直廳卒致問黯輒答卒父恚一夕歸鄉里他日疾且亟黯內懷不

自安請徙郡及解官就養不報乃棄官去黥母陳歸宗繼母史在堂後迎陳歸二母不相善黥能安以事之

臣按致問故人非于州事有撓也黥之笞卒失愉婉之道矣且親即有過豈可直情徑行如是哉棄官而歸亦不遠之復也

王濟父恕開寶中知秀州盜起城陷為所殺將并害濟濟伏柩號慟謂賊曰吾父已死吾安用生為但恨力不能殺汝以報父讐耳賊義之捨去濟攜父骨匿山谷間

既而官軍大集濟脫身謁其帥陳討賊之計

晁宗慤性敦厚事父母孝

張師德孝謹有家法不交權貴

喬維岳為淮南轉運使常按部至泗州司獄法掾誤斷
囚至死維岳詰之掾俯伏且泣曰有母年八十餘今獲
罪則母不能活矣維岳憫之因謂曰他日朝制按問第
云轉運使令處茲罪卒如其言獲免維岳坐贖金百二
十斤

臣按此亦錫類之孝也有合于經不敢惡于人之義矣為法受罰觀過可以知仁

周審玉知鳳翔府代還奉朝請俄丁內艱既而謂親友曰僕齒髮遲暮而未能辭祿仕者良以慰母心爾今可行其志矣乃拜章請老

李肅之內行修飭母喪廬墓三年不入城郭季弟承之生而孤鞠育誨道至于成人隨相繼為侍從

張知白九歲其父終邢州殯于佛寺及契丹寇河北寺

宇多頽廢殞不可辯知白既登第徒行訪之得佛寺殿
基恍然識其處既發其衣衾皆可驗衆歎其誠孝

張逸以謝泌薦引對真宗問欲何官逸對曰母老在家
願得近鄉一幕職官歸奉甘旨足矣

王隨為京西轉運使陞辭且言曰臣父母家洛中乃在
所部歸奉湯藥聖主之澤也真宗因賜詩寵行以羊酒
束帛令過家為壽

初暉天禧中母卒葬於州城之南暉既解官就墳側構

小室號泣守護蔬食經六冬墮足二指有白烏白兔馴
擾墳側州人異之以狀聞有詔旌美賜粟帛

張士遜生七日喪母其姑育養之既長事姑孝謹姑亡
為行服徒跣扶柩以葬

杜誼事父母至孝父剛嚴誼獨失愛惴惴不自容伺顏
色而後進繼喪父母號慟晝夜不絕勺水不入口者累
日卜葬徒跣負土為墳往來十餘里日渡塘澗泥水沒
胛雖大雨雪未嘗少止手足皸裂血流以漆塗之每覆

一畚必三繞墳號而後去既葬遂茆舍墓傍負土終喪人往視之輒遣去日一飯不葷雖虎狼交于墓側誼泰然無所畏

朱壽昌以父異蔭歷官知廣德軍母劉氏異妾也異守京兆劉氏方娠而出壽昌生數歲始歸父家母子不相聞五十年行四方求之不置飲食罕御酒肉言輒流涕熙寧初與家人辭訣棄官入秦曰不見母吾不反矣遂得之于同州劉時年七十餘矣嫁党氏有數子悉迎以

歸京兆錢明逸以其事聞詔還就官由是以孝聞天下
自王安石蘇頌蘇軾以下士大夫爭為詩美之壽昌以
養母故求通判河中府數歲母卒壽昌居喪幾喪明既
葬有白鳥集墓上撫同母弟妹益篤

韓宗師在神宗朝數賜對常弗忍去親側辭官不拜世
以孝與之

包拯知建昌縣以父母皆老辭不就得監和州稅父母
又不欲行即解官歸養後數年親繼亡拯廬墓終喪猶

徘徊不忍去

錢勰以主簿召對將任以清要官王安石使弟安禮來見許用為御史勰謝曰家貧母老不能為萬里行

張昇累官度支員外郎換涇原秦鳳安撫都監未幾以母老求歸故官得知絳州改京西轉運使知鄧州又以母辭或指為避事范仲淹言于朝曰張昇豈避事者乃許歸養

趙鼎郊祀當任子進階爵乞回其恩封母郡太君宰相

謂曰君即為學士擬封不久矣槩曰母年八十二願及
今拜君賜以為榮乃許之後遂為例

胡宿居母喪三年不至私室

曾鞏性至孝友父亡奉繼母益至撫四弟九妹于委廢
單弱之中宦學婚嫁一出其力

黃庭堅性篤孝母病彌年晝夜視顏色衣不解帶及亡
廬墓下哀毀得疾幾殆

彭思永居母喪窶甚鄉人餽之無所受子衛亦孝謹以

父老棄官居十餘年族里稱之

張魁母病輒割股肉和藥以進母遂愈其後母卒廬於墓自負土植松柏

蔣偕父病常刲股以療父愈詰之曰此豈孝耶曰情之所感實不自知也

張昭遠父凝殿前都虞侯寧州防禦使契丹入寇凝陷圍中昭遠年十八挺身掖出之

章綵應舉入京聞父對獄于魏棄不就試馳往直其寃

張景憲母卒一夕鬚髮盡白世以此稱之

孫瑜爽子始爽之亡朝廷錄其子孫時瑜之子為諸孫
長瑜曰吾忍因父喪而官吾子乎以兄之孤上之

張揆幼篤孝父蘊病割股肉以療

李載性篤孝侍母病不解帶至病亟不能食載亦不食
母知之強食

沈起監真州轉般倉聞父病委官歸侍有司劾其擅去
終喪薦書應格當選用帝謂輔臣曰觀過知仁今由父

疾而致罪何以厚風教而勸天下之為人子者乃特遷之

范祖禹幼孤叔鎮撫育如己子祖禹自以既孤每歲時親賓慶集慘怛若無所容

王巖叟鄉與省試廷對皆第一調欒城簿涇州推官甫兩月聞弟喪棄官歸養

孔武仲喪二親毀瘠特甚右肱為不舉

姚兕父寶戰死定川兕幼失父事母孝凡圖畫器用皆

刻仇讐未報字

張根性至孝父病蠱戒鹽根為食淡母嗜河豚及蟹母終根不復食母方病每至雞鳴則少蘇後不忍聞雞聲任諒九歲而孤舅欲奪母志諒挽衣泣曰豈有為人子不能養其親者乎母為感動而止諒力學自奮年十四即冠鄉書登高第

岳飛為宣撫副使置司襄陽居母憂降制起復飛扶觀還廬山連表乞終喪不許累詔趣起乃就軍飛至孝母

初留河北遣人求訪迎歸母有痼疾藥餌必親母卒水漿不入口者三日

楊政父忠崇寧初夏人舉國大入戰歿政甫七歲哀號如成人其母奇之曰孝于親者必忠于君此兒其大吾門乎

翟汝文登進士第以親老不調者十年

洪遵父皓留沙漠母亡遵孺慕攀號既葬兄弟即僧舍肄詞業夜枕不解衣

鄧肅居父喪哀毀踰禮芝產其廬

李植以母老願便養除知桂陽軍丁母憂歸葬哀毀廬墓有白鷺朱草之祥劉鎮遺之書曰忠臣孝子元直魚之矣

蕭振調婺州兵曹任滿歸告其親曰家世業農幸有田可以奉甘旨振不願仕後拜監察御史以親老乞補外上不許面奏曰臣事親之日短事陛下之日長指心自誓曰今日之事父母乃他日之事陛下也

洪擬初自海州還居鎮江趙萬兵叛擬挾母出避賊至欲兵之擬曰死無所避願無驚老母賊舍之他賊又至臨以刃擬指其母曰吾母也幸勿怖之賊又舍去

曾幾事親孝母死蔬食十五年

陳俊卿幼莊重不妄言笑父死執喪如成人

龔茂良居父母喪哀號擗踊鄰不忍聞

劉珙居家孝喪繼母卓氏年已逾五十盡哀致毀內外

總功之戚必素服以終月數

汪應辰為吏部郎官遷右司母老乞外丞相苦留之曰
方進用未應爾應辰曰親老矣不可緩

王十朋事親孝終喪不處內

顏師魯孝友天至初為番禺簿喪父以歸扶柩航海水
程數千里甫三日登于岸而颶風大作人以為孝感

李椿父升進士靖康之難升翼其父以背受刃與長子
俱卒椿年尚幼藁殯佛寺深窰而詳識之奉繼母南走
艱苦備嘗竭力以養

彭龜年七歲而孤事母盡孝

王信初為建康府學教授扶其父喪歸草履徒行雖疾風甚雨弗避也由是得寒濕疾及卒遺訓其子以忠孝公廉

柳約天性至孝母病甚泣禱於天願損壽以益親壽母尋愈約竟先母兩月卒

高定子為鄭縣主簿吳曦畔乞解官養母曦誅攝府事宇文公紹以忠孝兩全薦之調中江縣丞父就養得疾

定子衣不解帶者六旬居喪哀毀骨立

高斯得父稼死事于沔斯得日夜西嚮號泣會其僮至自沔知稼戰歿處與斯得潛行至其地遂得稼遺體奉以歸見者感泣服除而哀傷不已無心仕進

趙希館少扶父喪歸道遇寇左右駭散希館撫棺慟哭不懾寇義而去

趙必愿未弱冠丁大母憂哀毀骨立丁父憂居喪盡禮馬廷鸞世貧力學既冠里人聘為童子師遇有酒食饌

則念母藜藿不給為之食不下咽

危禎性至孝父疾願損已算益親年疾尋愈

程公許少知孝敬大母侯疾公許不交睫數月疾革嘗其痰沫既卒哀毀踰制

吳淵五歲喪母哭泣哀慕如成人

趙葵知滁州母疾謁告省侍不得刲骨雜藥以寄之母卒葵求解官不許不得已復視事淳祐三年葬其母乞追服終制不允葵上疏曰臣時于草土被命起家勉從

權制先國家之急而後親喪也今釋位去官已追服居
廬乞從曩制又不許再上疏曰臣昔者奉詔討逆適丁
家難然哀疚之中命以驅馳之事移孝為忠所不敢辭
是臣嘗先國家之急而効臣子之義親恩未報寢踰一
紀食稻衣錦俯仰增愧且臣業已追哀麻之制伸苦塊
之哀負土成墳倚廬待盡喪事有進而無退固不應數
月而除也及命提舉洞霄宮不拜

臣按葵在滁以李全故不得去官持服平全之後

便應終制而遲之一紀未可為純孝然兩疏誠懇
猶賢乎已錄之以愧當時之若史嵩之其人者

別之傑為河北安撫副使言親八十乞祠歸養庶幾君
親之義兩全從之

包恢侍其父疾滌濯掃除之役不命僮僕

趙景緯丁母憂以祿不逮養服闋不調景緯天性孝友
雅志冲溢無意仕進故其立朝之日不久云

徐霖丁外艱哀毀號絕水漿不入口七日

吳遵路母喪廬墓蔬食終制

劉清之母不逮養每展閱手澤涕泗交頤

遼耶律安巴父特哩以黨附東丹王

即人皇王倍

死安搏自

幼若成人居父喪哀毀過禮見者傷之事母至孝以父死非罪未葬不豫宴樂

蕭陽阿父卒自五番部親挽喪車至奚王嶺人稱其孝
蕭樂音奴三歲居父母喪毀瘠過甚

郭企忠幼孤事母孝謹年十三居母喪哀毀如成人

耶律安禮幼孤事母以孝聞遼季間關避難未嘗一日
怠溫清天眷初從元帥于山西母喪不克歸葬主帥憐
之賻禮甚厚安禮冒大暑挽柩行千餘里哀毀骨立行
路嗟歎

馬百祿幼志學事繼母以孝聞

任熊祥事母以孝聞母歿時熊祥年已七十不食三日
人皆稱之

完顏素蘭居父喪不飲酒廬墓三年時論以為難

元布呼密素貧躬自爨汲妻織紉以養母後因使還則母已卒號慟嘔血幾不起

郝經金末河南亂民匿窖中亂兵以火熏灼之死經母許亦死經以蜜和寒菹汁決母齒飲之即蘇時經九歲時人異之金亡徙順天晝則負薪米為養暮則讀書

烏克遜澤至大元年為福建廉訪使以母年踰八十求歸養長沙歲餘母喪澤以哀毀卒

雷膺生七歲而孤金末母侯氏挈膺北歸渾源艱險備

嘗織紵以為業課膺篤志于學事母以孝聞

高源幼力學事母孝僉江南浙西道提刑按察司事劾
常州路達魯噶齊馬恕奪民田及他不法事恕懼走賂
權臣阿哈瑪特以他事誣源既繫獄一日忽釋之莫知所
由先是源所居隣里多阿哈瑪特姻戚素知源事母至孝
至是聞源坐非辜悉詣阿哈瑪特曰源孝子也非但我知
之天必知之况媒孽之罪非實若妄殺源悖天不祥阿
哈瑪特感悟得不死

張起巖性孝友少處窮約下帷教授躬致米百里外以養父母撫弟如石教之宦學無不備至舉親族弗克葬者二十餘喪且買田以給其祭

哈喇巴哈幼侍母鄂屯氏居益都嘗歎曰幼而不學有不墮吾宗者乎父時以斷事官建牙保定合刺普華往白其志父奇之俾習畏兀書及經史記誦精敏出于天性李壇畔其母攜季子圖烈巴哈避地登萊間音問隔絕號泣徹晝夜繼從從叔父薩奇蘓平賊山東卒奉其

母以歸


孫抑

中郎

關保之變挈父母妻子避兵平陽之柏村有亂

兵至村剽掠拔白刃嚇抑母求財不得舉刃欲斫之抑
亟以身蔽母請代受斫母乃得釋而抑父被虜去不知
所之或語之曰汝父被驅而東矣然東軍得所掠民皆
殺之汝慎無往就死也抑曰吾可畏死而棄其父乎遂
往出入死地屢瀕危殆卒得父以歸

以上卿大夫之愛親



御定孝經衍義卷八十二